

四庫全書

集部

欽定四庫全書

聖祖仁皇帝御製文集卷二目錄

勅諭

諭吏兵二部

諭禮部

諭禮部

諭吏部

諭兵部

諭兵部都察院督捕衙門

諭戶兵二部

諭禮部

諭吏部等衙門

諭禮部

諭刑部

諭都察院左都御史明珠

諭禮部

諭禮部

諭吏兵二部

諭禮部

諭戶部

諭禮部

諭刑部等衙門

諭大學士巴泰索額圖李蔚魏裔介學士哲爾  
肯哈占達都色黑馬朗古張鳳儀靳輔陳鼐

永

諭禮部

諭禮部

諭戶部

欽定四庫全書

聖祖仁皇帝御製文集卷二

勅諭

諭吏兵二部

向來包衣佐領下官員子弟不准為廕生監生其筆帖式無有品級今思內外官員効力相同加恩豈宜有別包衣佐領官員子弟准為廕監及筆帖式給與品級之處尔部定議具奏特諭康熙九年二月二十八日

諭禮部

慈和皇太后誕育朕躬未遂孝養思慕之忱每切於懷  
雖已上

尊謚但今升祔

太廟配食

皇考典禮關係重大其應進

謚號著議政王貝勒大臣九卿科道會同詳議具奏特

諭康熙九年閏二月二十三日

諭禮部

皇考升遐倏忽十載罔極之思時恫於懷山陵在望未  
一展祭尤切悽愴朕擬於今歲八月恭行謁

陵禮又奉

太皇太后旨思念情慙亦欲詣

陵朕敬遵

慈命躬侍前往所有應行典禮及需用各項尔部詳議  
具奏特諭康熙九年閏二月三十日



諭吏部

朕思滿漢大小官員職掌相同品級有異應行畫一著議政王貝勒大臣會同定議具奏特諭康熙九年三月初九日

諭兵部

設立驛傳原為往來差遣緊要事務速於接應近聞州縣各驛馬匹缺少應付遲悞驛遞原有額設錢糧喂養草料驛傳道專行管理乃不盡心嚴察以致尅減錢糧

馬匹缺乏應作何稽察嚴禁尔部其詳議具奏特諭康熙九年三月十四日

諭兵部都察院督捕衙門

京師重地理宜肅清近聞京城內外惡棍肆行無忌或借端挾詐勒騙錢財或公然搶奪攪擾市肆或結夥橫行兇毆良民又夜間盜劫時聞拏獲甚少此皆步兵甲喇大該巡城御史司坊各官督捕司官捕營將弁稽察不嚴緝捕無能以致奸盜不息善良受害作何嚴行申

飭緝拏如該管官仍前怠玩者作何處分尔部院衙門會同定議具奏特諭康熙九年三月十四日

諭戶兵二部

滿洲甲兵係國家根本雖天下平定不可不加意愛養近聞八旗甲兵喂養馬匹整辦器械費用繁多除月餉外別無生理不足贍養妻子家口朕甚憫之月餉銀米應作何增給著為永例尔二部會同詳議具奏特諭康熙九年三月二十日

諭禮部

自閏二月以來天氣亢暘雨澤稀少農務方殷殊切朕懷著尔部堂上官同順天府官員竭誠祈禱其應斷屠宰照例行特諭康熙九年三月二十二日

諭吏部等衙門

時已入夏雨澤愆期皆由部院大小臣工因循舊習不能精白乃心公廉盡職以致政務失當有干

天和尔等堂上官宜力圖脩省靖共職業嚴督所屬司

官凡事應秉公勤勵革除積弊勿瞻徇情面仍稽察胥吏作奸事有應結者速行完結勿得借端多駁圖遂已私其問刑等衙門一切獄訟務期平允得情速審速結勿得株累無辜久淹羈禁尔等大小各官須實心脩省勿得視為具文仍前怠玩有負朕委任責成之意著吏部通行申飭特諭康熙九年三月二十二日

諭禮部

科爾沁博爾濟金氏秉圖郡王額濟殷之親叔額德台

吉之子三等台吉阿郁錫之女選進宮中待年方欲冊封今遽爾長逝朕心深切軫悼宜追封為妃其封號及應行禮儀尔部即察例議奏特諭康熙九年五月初九日

諭刑部

近覽章奏罪犯監禁踰限不行速審以致斃獄者甚多夫各犯自有應得之罪未死於法先死於獄殊非慎刑折獄之意朕心深為不忍尔部將踰限不結監斃幾人

以上者作何嚴加處分詳議定例具奏特諭康熙九年

六月十一日

諭都察院左都御史明珠

國家朝儀大體所在貴於整齊嚴肅不止係堂陛之觀瞻亦以見臣心之敬肆諸王大臣有踰越班行交相接語或輕佻嬉笑禮不踰階而相與言又況其甚乎爾衙門監察御史侍班切近見而不糾豈真目未之覩皆緣畏事徇情所以如此都察院職任重大朕躬有失尚爾

指陳王及諸臣乃不叅奏揆之事理實所未協今後有失儀者毋得容隱康熙九年八月初四日

諭禮部

太祖高皇帝創建鴻圖肇興景運

太宗文皇帝丕基式廓大業克弘迨

世祖章皇帝誕昭功德統一寰區即欲躬詣

太祖

太宗山陵以天下一統致告用展孝思因盜賊未靖師



旅繁興暫停往謁朕以眇躬纘承鴻緒上託

祖

宗隆庥天下底定盜賊緝寧兵戈偃息每念

皇考未竟之志朝夕寢食不遑寧處本欲先詣

太祖

太宗山陵再詣

世祖山陵因奉

太皇太后慈命以

世祖升遐十年未得一詣

陵寢於今年八月前往朕是以恭侍

太皇太后先詣

孝陵展謁禮成言還今欲仰體

皇考前志躬詣

太祖

太宗山陵以告成功展朕孝思著議政王貝勒大臣內院九卿科道掌印不掌印各官會議具奏爾部即遵諭

行特諭康熙九年九月初二日

諭禮部

天文關係重大必選擇得人令其專心習學方能通曉  
精微著選取官學生令其與漢天文生一同習學有精  
通者俟該衙門缺出考試補用作何選取習學爾部議  
奏特諭康熙九年九月初四日

諭吏兵二部

朕惟致治雍熙在於大小官員悉尚廉潔使民生得遂

內外滿漢文武官員各有職守理應律已潔清屏絕餽受乃能恪恭職業副朕任使至意近聞尚有因循陋習借名令節生辰在外文武官員剝削兵民餽送督撫提鎮司道等官督撫提鎮司道等官復苛索下官餽送在京大臣部院大臣官員科道等官在京官員亦交相餽遺前雖屢經嚴禁未見悛改仍行授受殊違潔已奉公之義兵民日漸窮困職此之由以後著痛加省改斷絕餽受以盡厥職如仍行餽受事發之日定將授受之人

一併從重治罪必不姑息尔部即遵諭嚴加曉諭內外  
遵行特諭康熙九年九月二十一日

諭禮部

朕惟至治之世不專以法令為務而以教化為先其時  
人心醇良風俗樸厚刑措不用比屋可封長治久安茂  
登上理蓋法令禁於一時而教化維於可久若徒恃法  
令而教化不先是舍本而務末也近見風俗日敝人心  
不古囂陵成習僭濫多端狙詐之術日工獄訟之興靡

已或豪富凌轢孤寒或劣紳武斷鄉曲或惡衿出入衙署或蠹棍詐害善良萑苻之劫掠時聞讐忿之傷殺疊見陷羅法網刑所必加誅之則無知可憫宥之則憲典難寬念茲刑辟之日繁良由化導之未善朕今欲法古帝王尚德緩刑化民成俗舉凡敦孝弟以重人倫篤宗族以昭雍睦和鄉黨以息爭訟重農桑以足衣食尚節儉以惜財用隆學校以端士習黜異端以崇正學講法律以儆愚頑明禮讓以厚風俗務本業以定民志訓子

弟以禁非為息誣告以全良善誠窩逃以免株連完錢糧以省催科聯保甲以弭盜賊解讐忿以重身命等項作何訓迪勸導及作何責成内外文武該管各官督率舉行尔部詳察典制定議具奏特諭康熙九年十月初九日

諭戶部

淮揚所屬地方歲比不登屢厯朕懷今年又遭異常水災黃淮交漲隄岸衝決百姓室廬多被淹沒夏麥未獲

登塲秋禾佈種水潦難施民生失所特差部臣速行踏勘准動正項錢糧存積銀米將饑民詳加賑濟但被災之民既無耕獲何以輸糧如再加催科愈不堪命今年淮揚所屬被災地方應徵錢糧共該若干爾部速行酌議蠲免以副朕恤災愛民至意特諭康熙九年十月初十日

諭禮部

帝王圖治必稽古典學以資啓沃之益經筵日講允屬



大典宜即舉行尔部詳察典例擇吉具儀來奏特諭康熙九年十月十三日

諭刑部等衙門

向來定例流徙尚陽堡寧古塔等處人犯六月十二月不行發遣其餘月分俱發今思十月至正月終俱屬寒冷之時流人多有貧者衣裝單薄無以禦寒以罪不至死之人凍斃道途殊為可憫以後流徙尚陽堡寧古塔人犯十月至正月終及六月俱停其發遣餘月照常發

遣尔部即遵諭行特諭康熙九年十二月十四日

諭大學士巴泰索額圖李蔚魏裔介學士哲爾肯  
哈占達都色黑馬朗古張鳳儀靳輔陳鼐永

朕近日披覽章疏於科道官條奏有合於事理裨益政  
治者虛懷聽納不憚見之施行其所言無益不可行者  
非勸襲陳言則浮泛塞責尔諸臣寧有不知今後有言  
關政理切實可行者照常票擬朕親加裁奪其或不可  
行者若悉下部議既屬無益徒令章奏繁多恐反致應

行政務有所稽違爾等可詳酌事理以不准行擬旨朕  
仍審擇而執其中古之聖帝賢王雖邇言是察亦無稽  
勿聽用言致治之道蓋當如此康熙九年十二月二十  
五日

諭禮部

朕前欲仰體

世祖章皇帝遺志躬詣

太祖

太宗山陵展祭以告成功命議政王貝勒大臣等會議  
議政王等以去年各處多有水旱之災且為時甚迫應  
用之物預備難及具題暫行停止今思

太祖

太宗創業垂統功德隆盛

山陵在望刻不能忘去年恭謁

孝陵禮成今已數月若再久延時日孝思莫殫朕懷殊  
切靡寧茲當海內無事欲乘此時躬詣

太祖

太宗山陵以告成功用展孝思事關大典著議政王貝勒大臣內閣九卿科道掌印不掌印各官會議具奏尔部即遵諭行特諭康熙十年正月十二日

諭禮部

今歲三春無雨風霾日作耕種愆期民生何賴皆由朕躬涼德政治未協大小臣工不能殫忠為國恪脩職業瞻顧因循惟圖自便偏私怠忽致干

天和用是朕夙夜靡寧深切儆惕今實圖修省勵精勤政體

上天仁愛之意感召休和為民請命內閣六部都察院等衙門大小官員各有職掌皆宜體朕倚任之意共効贊襄持廉秉公克盡厥職洗心滌慮痛改前非以迓

天和尔部即遵諭通行申飭祈雨事宜照例作速舉行特諭康熙十年三月十九日

諭戶部

頃因差往江南郎中禪塔海奏事來京朕面詢民生休戚據奏稱淮揚一帶地方水患未消人民饑饉流亡前雖行賑濟今無以餬口困窮至極聞此情形深切憫惻民為邦本如斯困苦豈可不速行拯救今應即行差官前往賑濟或就近截留漕米或動支何項銀兩糴米給散饑民爾部作速議奏特諭康熙十年三月二十八日

聖祖仁皇帝御製文集卷二

欽定四庫全書

聖祖仁皇帝御製文集卷三目錄

勅諭

諭內閣翰林院

諭刑部等衙門

諭禮部

諭吏部

諭兵部



諭宗人府吏兵二部

諭禮部

諭禮部

諭吏兵二部

諭吏部

諭兵部併督捕衙門

諭禮部尚書哈爾哈齊侍郎常鼎

諭太常寺

諭戶部

諭吏部等衙門

諭吏兵二部

諭吏部

諭刑部

諭工部

諭宗人府

諭刑部

諭禮部

諭兵部

諭禮部

諭戶部

諭戶部

諭吏部

諭兵部

諭吏部

諭吏兵二部

諭戶部



欽定四庫全書

聖祖仁皇帝御製文集卷三

勅諭

諭內閣翰林院

致治之道無過法祖鑒於成憲乃固有愆欽惟

太祖高皇帝開天垂統

太宗文皇帝式廓鴻圖規模弘遠啓佑無疆朕御極以

來景仰

先猷時切儀型之念

世祖皇帝時曾命儒臣纂修

太祖聖訓

太宗聖訓雖具彙進呈未經裁定頒布茲特命圖海李  
霽為總裁官折爾肯折庫納熊賜履為副總裁官達哈  
塔胡密子楊正中郭四海陳嘉猷富拉塔王颺昌陳志  
紀周弘衛既齊為纂修官滿官四員漢官四員為謄錄  
官滿漢典籍典簿四員為收掌官悉依前式分別義類

重加考訂勒成全書朕得以朝夕觀覽是訓是行亦俾  
子孫臣民率由無斁卿等膺茲委任須恪恭勤勵務期  
早竣以副朕觀光揚烈至意特諭康熙十年四月初四  
日

諭刑部等衙門

邇來天氣亢暘不雨或因刑獄淹禁中有冤枉亦未可  
知尔等將現監人犯詳加清理如有情罪可矜疑者照  
例減等發落其現審人犯尔等速為審理應減等者即



與減等應釋放者即行釋放務期獄無冤滯以迓  
天和尔等即遵諭行特諭康熙十年四月初五日

諭禮部

今已入夏亢暘不雨農事堪憂朕念切民生躬自刻責  
特頒嚴旨戒飭各官修省過愆祈求雨澤乃精誠未達  
霖雨尚稽朕心晝夜焦勞不遑啟處茲朕虔誠齋戒躬詣  
天壇祭告懇祈甘霖速降以拯生民尔部作速擇吉  
其祭告儀物即行備辦特諭康熙十年四月初七日

諭吏部

朕觀侍郎嚴正矩章雲鷺通政使霍叔瑾才具庸常不能盡職俱著以原官致仕尔部即遵諭行特諭康熙十年四月二十一日

諭兵部

武官有防守地方緝捕盜賊之責必弓馬嫻熟方克勝任其不稱職者雖總督提督等有不時糾叅之例但與其糾叅於後貽誤地方不如於選授之時詳加選擇除

現任推陞各員外以後凡係應到部掣籤之官尔部即考驗其弓馬然後令其掣籤如有不堪者具題照例給以原品頂帶停其補授尔部即遵諭行特諭康熙十年五月十一日

諭宗人府吏兵二部

以後王以下及文武官員處分罰銀及罰土黑勒威勒之例應否酌量其情罪改為罰俸著確議具奏特諭康熙十年五月二十六日

諭禮部

朕仰體

世祖章皇帝遺志欲躬詣

太祖

太宗山陵展祭以告成功前命議政王貝勒大臣九卿  
科道等會議以各處多有災傷暫行停止今奉

太皇太后旨謂朕躬謁

山陵展祭告成關係大典即宜舉行以盡孝思朕仰遵

慈命擬躬行謁

陵禮應行事宜及需用各項著各該衙門速行備辦尔部即遵諭行特諭康熙十年八月初六日

諭禮部

耕藉大典事關勸農來春應照例舉行其應行事宜詳察典例具奏特諭康熙十年八月初八日

諭吏兵二部

差官巡察各地方及差遣大臣閱視兵馬等事前經條

奏俱著候旨舉行今思巡察地方關係吏治民生閱視  
兵馬關係邊防軍務俱屬緊要應差遣何項官員著九  
卿科道會同確議具奏特諭康熙十年八月初八日

諭吏部

前因浙江巡撫范承謨以患病具奏准其回京調理故  
將山東巡撫袁懋功調補今據兩省督提奏稱百姓愛  
戴號泣請留情詞懇切特順民情俱著各留原任張鳳  
儀著候另缺推補尔部即遵諭行特諭康熙十年八月

二十九日

諭兵部併督捕衙門

直隸重地理宜肅清邇來盜賊繁多大為民害地方官怠玩不能力行禁戢以致劫掠時間真盜捕獲者少良民株累甚多皆因防汎官員止於降罰帶罪緝拏其間有失事最多不能盡職者仍令留任愈致貽悞地方今盜賊應作何禁戢嚴拏及以盜案降罰幾次者作何處分尔部再行定議具奏至京城內外盜賊棍徒肆行無

忌作何責成官役嚴行緝拏亦著一併議奏特諭康熙  
十年十二月初五日

諭禮部尚書哈爾哈齊侍郎常鼎

人君對越神祇務盡其誠敬之心禮儀節文宜臻明備  
每年元旦躬詣堂子展拜可令鳴贊贊禮永著為例康  
熙十一年正月初一日

諭太常寺

祀典關係重大理宜敬慎嫻習近見爾衙門典禮俱未



諳練又所奏音樂多未合節殊非慎重禋祀之義以後  
著詳加練習勿得仍前怠忽褻越祀典特諭康熙十一  
年正月十八日

諭戶部

江南省連年水旱相仍災傷甚重與別省不同若將舊  
欠錢糧一併追徵民生愈致困苦朕心不忍其該省以  
前未完錢糧察實係拖欠在民者著暫行停徵俟民力  
稍蘇之時再行具奏請旨戶部即遵諭行特諭康熙十

一年四月初四日

諭吏部等衙門

江南省事務繁劇與他省不同向來照定限料理不能如期完結各官罹叅罰者甚多前原任山陝總督莫洛曾請寬限積案始得清楚今應照此例將江南省一切陳積事件寬其限期令地方官料理完結尔部等衙門詳議具奏特諭康熙十一年四月初六日

諭吏兵二部

陝西幅員遼闊邊疆重地防禦宜周省城有將軍滿兵駐防總督衙門應移駐近邊扼要地方專管陝西以便控制其山西省附近京師應照山東河南例令該撫料理尔二部會同詳議具奏特諭康熙十一年四月十八日

諭吏部

原任大學士衛周祚品行端方清慎素著曩以引疾請告回籍調理今閣務殷繁贊理需人著即召取馳驛來

京入閣辦事尔部即遵諭行特諭康熙十一年四月二十七日

諭刑部

刑獄重地人命攸關天氣炎熱亟宜清理雖熱審現有定例但已結大案現在監禁各犯或有無知而罹法網小過而陷重辟者株連無辜久淹禁羈朕心每思及此深為惻然茲特遣大學士圖海杜立德學士哈占宋德宜等會同三法司逐一詳加審鞫凡有罪可矜疑者即

與察明事由開列具奏務使情法允協有枉必申以副朕欽恤刑獄至意特諭康熙十一年六月二十五日

諭工部

河道屢年衝決地方被災民生困苦深軫朕懷據差往看視決口侍衛吳丹學士郭廷祚回京繪圖進呈朕觀黃河自宿遷以至清河皆為緊要雖有遙堤恐一層未足捍蔽水勢應否於遙堤之外再築遙堤爾部即行河道總督漕運總督會同相視商酌築堤果否有益併所

需錢糧若干逐一詳確議奏尔部即遵諭行特諭康熙  
十一年六月二十七日

諭宗人府

貝子尚善性行端良凡事小心敬慎勤勞為國著仍復  
其原多羅貝勒尔衙門即遵諭行特諭康熙十一年閏  
七月初二日

諭刑部

設立刑法原以戢奸禁暴必事情重大方可用刑嚴訊

近見內外問刑衙門嘗有濫用夾棍致斃人命者朕心殊為不忍以後審問事情爾等務加詳慎勿得輕聽問官不分輕重動輒夾訊希圖草率結案仍將審事官員嚴加申飭不時稽察具有任情作弊者即行指實題叅務使重刑不得濫及無辜以副朕矜恤民命至意若有不應夾訊之人擅用夾棍及罪不至死徑行夾死者應作何處分尔部會同吏兵二部定議具奏特諭康熙十一年閏七月十四日

諭禮部

帝王致治首在維持風化辨別等威崇尚節儉禁止奢侈故能使人心淳樸治化休隆近見内外官員軍民人等服用奢靡僭越無度富者趨尚華麗貧者互相效尤以致窘乏為非盜竊詐偽由此而起人心嚚凌風俗頹壞其於治化所關匪細今應作何分別務行禁止著九卿科道會同嚴加確議定例具奏特諭康熙十一年八月十一日



諭兵部

都統副都統職司軍務關係重大必得其人乃克勝任以後漢軍都統缺出著將該旗副都統應陞官員現任提督一併開列具奏副都統缺出著將該旗叅領應陞官員現任總兵官一併開列具奏爾部即遵諭行特諭  
康熙十一年十月十九日

諭禮部

民資粒食以生今當播種之時亢暘不雨農事堪憂皆

由朕躬涼德政治有所未協未能仰格

天心用是夙夜靡寧實圖修省以感召休和為民請命  
尔部即虔誠祈禱雨澤以副朕勤恤民隱至意特諭康  
熙十二年三月十一日

諭戶部

江南要地財賦繁多前馬祐所報歷年那移侵欠錢糧  
數目未清雖經有旨暫行停徵但官民侵欠必須分晰  
明白應追應蠲始免牽混若止責令該督撫清察歲月

遲延茫無頭緒以致官民受累無所底止今應否專差大臣前往徹底清察著九卿科道會同詳議具奏特諭  
康熙十二年三月十三日

諭戶部

江南蘇松常鎮淮揚六府連年災荒民生困苦與別處不同朕心時切軫念除今年錢糧已經派撥兵餉外其六府康熙十三年地丁正項錢糧特行蠲免一半以昭朕存恤災黎至意爾部即將應蠲免數目察明確議具

奏特諭康熙十二年四月十二日

諭吏部

國家大小事務在內責成部院在外責成督撫其事情  
重大煩難者固應照限完結如平常易結之事理應速  
結以清沉滯近見內外各衙門題覆本章有將易結之  
事遲延不結必俟限滿乃為具題其不行具題完結遲  
滯者必多牽連守候必致苦累以後著速行完結勿得  
遲延務俾案件清楚以副朕委任至意尔部即通行傳

諭遵行特諭康熙十二年五月十一日

諭兵部

茲因地方底定平西親王吳三桂平南王尚可喜靖南王耿精忠各具疏請撤安插已允所請令其搬移前來地方應行事務及兵馬機宜必籌畫周詳乃為善後之策應各遣大臣一員前往會同該藩及總督巡撫提督商確作何布置官兵防守地方並照管該藩等起行應差官員職名開列具奏特諭康熙十二年八月初九日

諭吏部

國家設立言官專司耳目凡政治得失民生利弊必須  
詳切條陳直言無隱斯為稱職若但敷衍虛文浮冗勦  
襲或以不急之務草率塞責非朕廣開言路之意今將  
科道官親加考試其留用各員著益加勉勵殫心盡職  
以副委任內石文郁范時起何名揚才庸無文不稱言  
職著革職尔部即遵諭行特諭康熙十二年八月十二  
日


諭吏兵二部

雲南地屬遠疆今該藩官兵既撤控制需人應專設雲南總督一員添設提督一員責成專管料理爾部速議具奏特諭康熙十二年八月十八日

諭戶部

平西親王吳三桂平南王尚可喜靖南王耿精忠等請撤安插已允搬移該藩及各官兵家口安插地方所需房屋田地等項應預為料理務令到日即有寧居以副

朕體恤遷移至意尔部作速詳議具奏特諭康熙十二年八月十八日





聖祖仁皇帝御製文集卷三

欽定四庫全書

集部

聖祖仁皇帝御製文集卷六

四至

臣 永瑤 恭 校

侍讀臣 孫球 覆 勘

覆校官中書 臣 施光輅

校對官助教 臣 胡予襄

校對官中書 臣 王鍾泰

謄錄貢生 臣 孔繼峯

謄錄監生 臣 沈一諤

欽定四庫全書

聖祖仁皇帝御製文集卷四目錄

勅諭

諭禮部

諭吏部

諭吏部等衙門

諭刑部

諭戶部

諭吏兵二部

諭吏禮二部

諭吏兵刑三部

諭兵部

諭兵刑二部

諭兵部

諭吏兵二部

諭吏部

諭兵刑二部

諭兵部

諭禮部

諭兵刑二部

諭兵部

諭兵部



欽定四庫全書

聖祖仁皇帝御製文集卷四

勅諭

諭禮部

壇廟祭祀國家大典必儀文詳備允符禮制乃可肅將  
誠敬昭格神明其致祭時辰齋戒處所稽諸往代各有  
定制爾部詳察典例酌議安確具奏特諭康熙十二年  
八月二十日

諭吏部

向來定例外官告病不准起用原以防其規避但其中或有才品優長政績素著者迫於一時至情引例告歸終身棄置不錄深為可惜應令地方督撫確行諮訪果有才品堪用者據實保奏以憑擢用其作何舉行尔部詳議具奏特諭康熙十二年九月初五日

諭吏部等衙門

國家致治首在崇尚寬大愛惜人才俾事例簡明易於



遵守處分允當不至煩苛乃符明作惇大之治向來各部衙門俱定有處分條例已經頒行但其中款項太多過於繁密以致奉行者或以膠執為守法或以苛察為詳明或例所未載援引比附輕重失宜徒據成規固原情理大小各官稍有過誤動觸文網雖具才能弗獲展布深為可惜著該部各衙門將見行處分條例重加訂正斟酌情法刪繁從簡應去應留逐一分別詳議具奏特諭康熙十二年九月十八日

諭刑部

自古帝王欽恤民命務期獄無枉縱讞決明允以成刑  
措之治朕每於秋決重犯特為詳慎惟恐一夫有冤以  
傷和氣向來朝審之例先期進呈招冊然後九卿科道  
會審覆奏完結乃外省秋審奏本內止有節畧觀覽未  
能明晰又有屢經續到之案為期甚迫以致過期復俟  
來年殊為不合以後外省秋審應令預期照在京朝審  
例造冊進呈亦著九卿科道會同覆核奏請定奪其造

進招冊及奉旨結案行咨俱應限定日期爾部一併詳議定例具奏特諭康熙十二年十一月初一日

諭戶部

自古國家久安長治之謨莫不以足民為首務必使田野開闢蓋藏有餘而又取之不盡其力然後民氣和樂聿成豐亨豫大之休見行墾荒定例俱限六年起科朕思小民拮据開荒物力艱難恐催科期迫反致失業朕心深為軫念以後各省開墾荒地俱著再加寬限通計

十年方行起科其該管地方官員原有議叙定例如新任之官自圖紀叙故掩前功紛更擾民者著各該督撫嚴行稽察題叅處分尔部即遵諭行特諭康熙十二年十一月初五日

諭吏兵二部

國家用人宜尚恬靜之風人臣服官首重廉耻之節邇來文武官員或因不得陞遷或因不與差遣輒稱冤枉紛紛控告不過圖便已私原非從公起見即使果係應

陞應差自行辨白希求榮利廉耻之道已虧豈能修舉  
職業克副任使理宜嚴加禁止以肅官常尔二部通行  
申飭遵行特諭康熙十二年十二月初六日

諭吏禮二部

致治之道首重人才儲養之源由於學校必衡鑒得人  
釐剔有法乃能革除積弊遴拔真材以彰文治之盛近  
聞直省學差沿襲陋規隳廢職業營私作弊考試不公  
以致真才淪棄文治不光今應作何整飭差遣何官磨

勘考核之法何以盡善務期永革弊端著九卿科道會同詳確議奏特諭康熙十二年十二月十八日

諭吏兵刑三部

吳三桂背恩反叛其原係伊所屬之人見在直隸各省文武官員人等恐因三桂反叛心懷疑畏致罹法網有負朕撫育好生之意已有諭旨槩從寬宥雖有父兄弟見在雲南者亦不株連其見隨吳應熊在京及職任部院官員亦應寬宥著議政王貝勒大臣會同確議具

奏康熙十二年十二月二十三日

諭兵部

近因逆賊吳三桂背恩反叛已遣大兵前往征剿聞彼處百姓有預先驚避者輕離家室恐致失所朕心深為憫念向來大兵紀律嚴明所過並無騷擾今寧南靖寇大將軍啓行朕復面加戒諭務令秋毫無犯安輯地方逆寇煽亂不過一隅大兵到日立見蕩平該地方軍民人等俱係朕之赤子遣發大兵原以衛民何必妄生驚

恐著該地方官廣行宣諭俾其各安生理勿致流離以副朕定亂安民之意尔部即速行湖廣督撫提鎮等官通行曉諭遵行特諭康熙十三年正月十八日

諭兵刑二部

近因逆犯楊起隆詐稱朱三煽惑愚民潛謀不軌陸續緝獲俱經審明正法其株連者業行省釋除逆首楊起隆張子房金玉環鄭得勝仍嚴緝務獲外其餘黨與一槩從寬免緝以後著改行從善恪遵法紀勿得自干憲



典軍民人等俱宜各安生理不得聽信訛言自生疑懼  
旁人亦不許妄行搜拏首告借端嚇詐擾害善良尔二  
部即出示通行曉諭特諭康熙十三年正月二十三日

### 諭兵部

陝西提督王輔臣久歷戎行勞績素著近舉首反賊吳  
三桂所送逆劄遣子奏聞堅守臣節益見忠貞朕心深  
為嘉悅前已有旨事平之日從優議叙今應即行加恩  
以彰激勸及其子作何叙用尔部一併速議具奏特諭

康熙十三年二月初四日

諭吏兵二部

陝西邊陲要地西控番回南通巴蜀幅員遼闊素號嚴疆茲逆賊吳三桂煽亂滇黔四川從逆秦省地處鄰封恐有奸徒搖惑以致人心不寧雖有督撫提鎮等官各盡乃職但軍務繁重必須專遣大臣假以便宜相機行事方可綏靖中外保固邊疆刑部尚書莫洛前任秦督深得軍民之心諳曉地方情形茲特授為經畧率領滿

兵駐劄西安府會同將軍總督而行巡撫提鎮以下悉聽節制兵馬糧餉悉聽調發一切應行事宜不從中制文武各官聽便選用吏兵二部不得掣肘隣省用兵當應援者酌量策應如有軍機將軍總督領兵而行俟湖廣四川地方底定即命還朝應兼職銜及應給勅印尔二部會同速議具奏特諭康熙十三年二月二十七日

諭吏部

大兵進勦逆賊指日蕩平地方恢復之後即應設官撫

綏民生料理事務頃以需人甚急已將漢軍堪用人員  
照該督撫所請發往軍前候用其漢人中素有清操及  
才能堪任煩劇者不拘資格著漢官大學士以下三品  
堂官以上據實保舉發往軍前與漢軍官員一體並用  
務期虛公舉薦有裨地方以副朕廣攬人才之意爾部  
即遵諭行特諭康熙十三年三月二十日

諭兵刑二部

逆賊吳三桂值明季闖賊之變委身從賊尋以父死賊

手窮竄來歸

世祖章皇帝念其投誠優封王爵授之軍旅委以事權  
異數殊恩振古未有爰及朕躬特進親王倚任等於腹  
心恩禮加於勲舊方期其感恩圖報殫竭忠忱詎意三  
桂以梟獍之資懷狙詐之計陰圖不軌自啓釁端藉請  
搬移輒行叛逆煽惑奸宄荼毒生靈極惡窮兇神人共  
憤已經遣發大兵進勦剋期蕩平諸王大臣會議反逆  
子孫理應誅戮以彰國法再三奏請朕尚冀其悔禍自

新東身待罪未忍即行加誅近覽三桂奏章詞語乖戾  
妄行乞請諸王大臣咸以三桂怙惡不悛其子孫即宜  
棄市再難寬緩朕思亂臣賊子孽由自作刑章具在衆  
論僉同朕亦不得而曲貸之也本當照廷議將吳應熊  
吳世霖并其餘子俱行凌遲處死但以應熊久在近侍  
朕心不忍故將應熊及子世霖處絞其餘幼子俱免死  
入官應坐人犯分別正法所有干連人等情罪稍可矜  
原者勅所司槩行省釋以昭法外之仁尔二部即通行

曉諭內外軍民人等俾咸悉朕意特諭康熙十三年四月十三日

諭兵部

逆賊耿精忠庸懦無能癡愚寡識祇緣伊祖耿仲明航海來歸

太宗文皇帝念其投誠之功特封王爵寵眷優隆

世祖章皇帝定鼎燕京復加委任令其統兵鎮粵中道殞身其子耿繼茂叨恩承襲兩鎮巖疆恪共職守朕惓

懷勲裔恩禮有加及其病亡尤深軫卹特遣部臣頒賜  
勅諭俾耿精忠襲封王爵自伊祖以及伊身受恩三世  
四十餘年在精忠賴祖父之餘勲冒朝廷之崇秩自宜  
感恩圖報殫竭忠忱不意其包藏禍心潛謀不軌乘吳  
逆之變輒行反叛煽亂地方罪惡昭彰國法難宥今削  
其王爵遣發大兵進勦指日蕩平但念其所屬官兵及  
地方官員軍民人等或被逆賊迫脅雖懷忠義莫能自  
明恐大兵一到玉石難分有能擒斬耿精忠投獻軍前



者優加爵賞或以兵馬城池納款者論功叙錄或力有不逮能自拔來歸者亦免罪收用其原係所屬之人直隸各省文武官員人等槩從寬宥雖有父子兄弟見在福建者亦不株連勿得心懷疑畏自罹法網負朕好生之意尔部即作速通行曉諭遵行特諭康熙十三年四月二十七日

諭禮部

皇后黑舍里氏作配朕躬已經十載上事

太皇太后

皇太后克盡誠孝佐朕內治尤極敬勤節儉居身寬仁  
逮下宮闈式化淑德彰聞茲於康熙十三年五月初三  
日崩逝惓懷懿範痛悼彌深宜有稱謚以垂永久著內  
閣翰林院會同擬奏其應行典禮爾部詳察速議具奏  
特諭康熙十三年五月初八日

諭兵刑二部

蔡祿係福建投誠之人念其來歸加以官銜給之世職

復從優擢用補授河南河北總兵官理應殫竭忠忱力  
圖報効不意其潛蓄逆謀欲應吳逆披甲練兵約期煽  
亂經驛遞所設筆帖式密行報部奏聞差內大臣阿密  
達前往察訊已近懷慶令人喚彼乃并不出城迎接及  
入城往伊衙門輒敢放砲射箭拒敵因其叛形顯著俱  
行擒拏奏請正法朕以人命關係重大恐有冤枉復令  
詳加究審據其兵丁家人口供稱蔡祿製造烏鎗買騾  
馬與楊來嘉差人往來同謀要迎吳逆謀反情真即將

蔡祿父子併伊姪蔡鼎席及同謀罪犯人等俱行正法  
其餘投誠墾荒弁兵事無干涉者槩不株連叛逆法所  
必誅良善務加綏輯國有成憲軍民無得驚疑尔二部  
即通行曉諭俾咸悉朕意特諭康熙十三年五月十一  
日

諭兵部

平南王尚可喜累朝勲舊久鎮巖疆勞績懋著近吳三  
桂等叛逆以來復能篤守忠貞殫心籌畫屢抒謀略保

固地方事平之日從優議叙已經有旨其藩下官兵及該省文武官員兵丁俱能協力同心克効忠順防禦逆賊勞瘁行間朕心時切軫念事平之日俱著一併從優叙賚尔部即速行傳諭俾咸悉朕意特諭康熙十三年五月二十六日

諭兵部

曩者耿精忠之祖耿仲明於

太宗文皇帝時航海歸誠優錫王爵効力行間勞績茂

著及其身故墨勒根王不令承襲

世祖章皇帝追念舊勲特准其子耿繼茂仍襲王封令其兩鎮嚴疆為國藩屏爰及朕躬惓懷勲裔恩寵有加後覽其病終遺疏有地方兵民凋敝賊寇未滅死不瞑目等語忠義肫篤深切軫念且因繼茂之子精忠自幼曾為近侍准襲王爵仍鎮閩省朕以精忠必能紹伊祖父遺訓殫竭忠猷無忝先烈乃不意近為逆賊吳三桂誘惑煽亂地方棄累世之忠貞搆一旦之狂舉既干國

法復墜家聲朕猶念其祖父前功諒精忠必係一時無  
知墮人狡計與吳三桂不同故將三桂子孫正法精忠  
在京諸弟照舊寬容所屬官兵並未加罪今湖廣遣寧  
南靖寇大將軍順承王統領大兵由湖南進勦雲貴吳  
逆指日授首鎮南將軍尼雅漢統領大兵由廣西進勦  
雲貴四川遣安西將軍赫業及西安將軍瓦爾喀等統  
領大兵已攻克七盤朝天等關直抵保寧刻期底定全  
川並勦雲貴安南將軍希爾根統領大兵由江西進勦

福建平寇將軍耿特巴兔魯統領大兵由廣東進勦福建又遣揚威將軍阿密達鎮西將軍席普臣安南將軍華善鎮東將軍喇哈達等各統領大兵駐劄江南京口等處調度征勦精忠殲滅在於旦夕但念其祖父宣力累朝洎精忠之身遽至覆亡宗祀斬絕朕心深為不忍且吳三桂乃本身投誠之人背恩反叛自取誅戮精忠祖父以來受恩三世四十餘年非素蓄逆謀首倡叛亂者比尔部即傳諭精忠果能追念累朝恩德及伊父忠



蓋遺言革心悔禍投誠自首將侵犯內地海賊速勦圖  
功即行赦免前罪視之如初朕以至誠待天下必不食  
言俾其善自審度勿負朕保全勲舊之意尔部即遵諭  
速行傳知特諭康熙十三年六月初一日

聖祖仁皇帝御製文集卷四